

পঞ্চাশত্তমী মহাপর্বের পরবর্তী রবিবার

পরমারাধ্য ঐশত্রিত্ব

প্রথম পাঠ - ১ করি ২:১-১৬

ঈশ্বরের ইচ্ছা : এক মহা রহস্য

ভাই, আমি যখন তোমাদের কাছে এসেছিলাম, তখন এসে ভাষা বা প্রজ্ঞার উৎকৃষ্টতা অনুসারেই যে তোমাদের কাছে ঈশ্বরের রহস্য জানিয়েছি, তা নয়; কেননা আমি মনে স্থির করেছিলাম, তোমাদের মধ্যে আমি যীশুখ্রীষ্টকে ছাড়া, ক্রুশবিদ্ধই যীশুখ্রীষ্টকে ছাড়া আর অন্য কিছু চিনব না। আমি দুর্বলতায়, ভয়ে ও কম্পিত অন্তরেই তোমাদের কাছে এসেছিলাম, আর আমার বাণী ও আমার প্রচার প্রজ্ঞার চিত্তগ্রাহী ভাষার উপর নির্ভর করছিল না, বরং আত্মাকে ও তাঁর পরাক্রম প্রকাশ করাই ছিল আমার উদ্দেশ্য, যেন তোমাদের বিশ্বাস মানবীয় প্রজ্ঞার উপরে নয়, ঈশ্বরের পরাক্রমের উপরেই নির্ভর করে।

আমরা সিদ্ধপুরুষদের মধ্যে প্রজ্ঞার কথা বলছি বটে, তবু সেই প্রজ্ঞা এই যুগের নয়, এই যুগের শাসনকর্তাদেরও নয়; এরা তো নস্যাত্ন হয়ে পড়ছে। কিন্তু আমরা এমন ঐশ্বরিক ও রহস্যময় প্রজ্ঞারই কথা বলছি যা গুপ্ত ছিল, যা ঈশ্বর আমাদের গৌরবের জন্য অনাদিকাল থেকেই নিরূপণ করেছিলেন। এ যুগের শাসনকর্তাদের মধ্যে কেউই তার কথা জানত না, কেননা যদি জানত, তবে গৌরবের প্রভুকে ক্রুশে দিত না। কিন্তু যেমন লেখা আছে, কোন চোখ যা যা দেখেনি, কোন কান যা যা শোনেনি, কোন মানুষের হৃদয়ে যা যা কখনও প্রবেশ করেনি, যারা তাঁকে ভালবাসে, ঈশ্বর তাদেরই জন্য এসব কিছু প্রস্তুত করেছেন। আমাদের কাছে কিন্তু ঈশ্বর আত্মা দ্বারাই সেই সবকিছু প্রকাশ করেছেন, কারণ আত্মা সবই তলিয়ে দেখেন, ঈশ্বরের গভীর সমস্ত বিষয়ও তলিয়ে দেখেন। বস্তুত, মানুষের অন্তরে যে মানবাত্মা বিদ্যমান, সেই মানবাত্মা ছাড়া কেইবা মানুষের অন্তরের কথা জানে? তেমনি ঈশ্বরের আত্মা ছাড়া কেউই ঈশ্বরের অন্তরের কথা জানে না। আর আমরা তো এজগতের আত্মা পাইনি, ঈশ্বরের আপন আত্মাকেই পেয়েছি, ঈশ্বর অনুগ্রহ করে আমাদের যা যা দান করেছেন, তা যেন জানতে পারি। এই সকল বিষয়ে আমরা তো মানবীয় প্রজ্ঞার শেখানো ভাষায় নয়, আত্মার শেখানো ভাষাতেই কথা বলি: আত্মিক বিষয়ের জন্য আত্মিক ভাষাই ব্যবহার করি। অপরদিকে প্রাকৃতিক মানুষ ঈশ্বরের আত্মার বিষয়গুলি সাদরে গ্রহণ করে নেয় না, সেই সব তার কাছে মূর্খতা; সেই সব সে বুঝতে অক্ষম, যেহেতু তা আত্মিক ভাবেই বিচার্য। কিন্তু আত্মিক মানুষ সেই সমস্ত বিষয়ের বিচার-বিবেচনা করতে সক্ষম, আর সে অন্য কারও বিচারার্থীন নয়। কেননা কেইবা প্রভুর মন জেনেছে যেন তাঁকে নির্দেশ দিতে পারে? কিন্তু আমরাই তারা, খ্রীষ্টের মন যাদের আছে!

শ্লোক এফে ১:১৭,১৮; ১ করি ২:১২ দ্রঃ

প্ আমাদের প্রভু যীশুখ্রীষ্টের ঈশ্বর, সেই গৌরবের পিতা, তাঁকে গভীরতর ভাবে জানার জন্য তোমাদের প্রজ্ঞা ও ঐশ্বরহস্য-উপলব্ধির আত্মা দান করুন। তিনি তোমাদের অন্তর্দৃষ্টি আলোকিত করে তুলুন

ট্ যেন তোমরা উপলব্ধি করতে পার তাঁর আহ্বানের প্রত্যাশা কী, পবিত্রজনদের মাঝে তাঁর উত্তরাধিকারের গৌরব-ঐশ্বর্য কী।

প্ তোমরা তো এজগতের আত্মাকে পাওনি, ঈশ্বরের আপন আত্মাকেই পেয়েছ,

ট্ যেন তোমরা উপলব্ধি করতে পার তাঁর আহ্বানের প্রত্যাশা কী, পবিত্রজনদের মাঝে তাঁর উত্তরাধিকারের গৌরব-ঐশ্বর্য কী।

দ্বিতীয় পাঠ - সাধু আখানাসিউসের পত্রাবলি

সেরাপিওনের কাছে ১ম পত্র, ২৮-৩০

ত্রিত্বের আলো, বিভা ও অনুগ্রহ

স্বয়ং প্রভু যা সম্প্রদান করেছেন, প্রেরিতদূতেরা যা প্রচার করেছেন ও পিতৃগণ যা রক্ষা করেছেন, কাথলিক মণ্ডলীর সেই প্রাচীন পরম্পরা, সেই ধর্মশিক্ষা ও বিশ্বাসের অনুসন্ধান করা মোটেই বৃথা কাজ নয়; কেননা সেই পরম্পরাগত ধর্মশিক্ষাতেই মণ্ডলী স্থাপিত হয়েছিল, ও যে কেউ তা থেকে বিচ্ছিন্ন হবে, সে কোন মতেই খ্রীষ্টান হতে পারবে না, খ্রীষ্টান বলেও অভিহিত হতে পারবে না।

অতএব, সে-ই পবিত্র ও সিদ্ধ ত্রিত্ব, যাঁ পিতা ও পুত্র ও পবিত্র আত্মায় স্বীকৃত, যাঁর মধ্যে ভিন্নপ্রকার ও বাইরে থেকে আগত কিছু নেই, যাঁ স্রষ্টা ও সৃষ্টির সংযোগের ফলও নন, কিন্তু সৃষ্টিশক্তি ও নির্মাণশক্তিই যাঁর সার, ও স্বরূপে যাঁ নিজেরই সমান ও একক, ও যাঁর কর্মশক্তিও এক। বাস্তবিকই পিতা পবিত্র আত্মায় পুত্রের দ্বারা সমস্ত কিছু সাধন করেন, আর এভাবে পবিত্র ত্রিত্বের ঐক্য সংরক্ষিত। এজন্য মণ্ডলীতে একেশ্বরই প্রচারিত, যিনি সকলের উর্ধ্ব, সকলের দ্বারা [সক্রিয়], ও সকলের অন্তরে [বিদ্যমান]। পিতা যিনি, আদিকারণ ও উৎস হিসাবে তিনি 'সকলের উর্ধ্ব'; তিনি আবার 'সকলের কাছে', কেননা পুত্রের মধ্য দিয়েই তিনি সকলের কাছে ক্রিয়ামূলক; তিনি আবার 'সকলের অন্তরে'ও, কারণ পবিত্র আত্মায় তিনি সকলের অন্তরে উপস্থিত।

করিস্তীয়দের কাছে পত্রে আধ্যাত্মিক বিষয়গুলো সম্বন্ধে কথা বলে পল সমস্ত কিছু অনন্য পিতা ঈশ্বরের কাছে পুনর্মিলিত করেন; তাঁর কথা এ, বহুবিধ অনুগ্রহদান আছে, আত্মা কিন্তু এক; বহুবিধ সেবাকাজ আছে, প্রভু কিন্তু এক; বহুবিধ কর্মক্রিয়া আছে, কিন্তু সকলের মধ্যে যিনি সেই সবকিছু সাধন করে থাকেন, সেই ঈশ্বর এক। কেননা আত্মা এক একজনকে যা যা বিতরণ করেন, তা পিতা দ্বারা পুত্রের মধ্য দিয়ে দেওয়া হয়, কারণ যা কিছু পিতার, তা পুত্রেরও সম্পদ, ফলত আত্মায় পুত্রের মধ্য দিয়ে যা যা দেওয়া হয়, তা প্রকৃতপক্ষে পিতারই দান। একই প্রকারে, আত্মা যখন আমাদের অন্তরে

রয়েছেন, তখন ঝাঁর কাছ থেকে আত্মাকে পেয়েছি, সেই বাণীও আমাদের অন্তরে রয়েছেন, এবং বাণীর মধ্যে পিতাও রয়েছেন, তাতে এ বচনটি সিদ্ধিলাভ করে : আমি এবং পিতা আসব, ও তার কাছে করব আমাদের নিজেদের বাসস্থান। কেননা যেখানে আলো রয়েছে, সেখানে তার বিভাও রয়েছে; আর যেখানে আলোর বিভা রয়েছে, সেখানে তার কর্মশক্তি ও তার উজ্জ্বল অনুগ্রহও রয়েছে।

করিস্থীয়দের কাছে দ্বিতীয় পত্রে পল এবিষয়ে চেতনা দিয়ে বলেন, প্রভু যীশুখ্রীষ্টের অনুগ্রহ, ঈশ্বরের ভালবাসা, ও পবিত্র আত্মার সহভাগিতা তোমাদের সকলের সঙ্গে থাকুক। কেননা অনুগ্রহ হল সেই দান যা ত্রিত্বেই দেওয়া হয়—পিতা দ্বারা পুত্রের মধ্য দিয়ে পবিত্র আত্মায় দেওয়া হয়। কেননা যেমন অনুগ্রহ পিতা দ্বারা পুত্রের মধ্য দিয়ে দেওয়া হয়, তেমনি আমাদের অন্তরে দানের সহভাগিতা হতে পারে না, যদি তা পবিত্র আত্মাতেই সাধিত না হয়। তবে পবিত্র আত্মার অংশী হয়ে উঠে আমরা পিতার ভালবাসা, ও পুত্রের অনুগ্রহ ও স্বয়ং আত্মার সহভাগিতা লাভ করি।

শ্লোক দা ৩:৫৬ দঃ

প্ এসো, পবিত্র আত্মায় পুত্রের দ্বারা পিতাকে পূজা করি :

ঊ তোমারই প্রশংসা, তোমারই গৌরব চিরকাল !

প্ ধন্য তুমি, ঈশ্বর, আকাশমণ্ডলের গগনতলে :

ঊ তোমারই প্রশংসা, তোমারই গৌরব চিরকাল !

খ্রীষ্টের দেহরক্ত

প্রথম পাঠ - যাত্রা ২৪ : ১-১১

তঁারা পরমেশ্বরকে দেখলেন, তথাপি খাওয়া-দাওয়া করতে পারলেন

একদিন প্রভু মোশীকে বললেন, ‘তুমি ও আরোন, নাদাব ও আবিহু এবং ইস্রায়েলের প্রবীণবর্গের মধ্য থেকে সত্তরজন, তোমরা মিলে প্রভুর কাছে উঠে এসো, আর দূরে থেকে প্রণিপাত কর। কেবল মোশীই প্রভুর কাছে এগিয়ে আসবে; ওরা কাছে এগিয়ে আসবে না, জনগণও তার সঙ্গে আরোহণ করবে না।’

মোশী গিয়ে জনগণের কাছে প্রভুর সমস্ত বাণী ও সমস্ত বিধিনিয়ম জানিয়ে দিলেন; সমস্ত লোক একসুরে উত্তরে বলল, ‘প্রভু যা কিছু বলেছেন, আমরা তা সবই পালন করব।’ তাই মোশী প্রভুর সমস্ত বাণী লিখে রাখলেন, এবং খুব সকালে উঠে পর্বতের পাদদেশে একটি যজ্ঞবেদি ও ইস্রায়েলের বারোটি গোষ্ঠী অনুসারে বারোটি স্মৃতিস্তম্ভ তৈরি করলেন। তিনি ইস্রায়েল সন্তানদের কয়েকজন যুবককে নির্দেশ দিলেন, যেন তারা প্রভুর উদ্দেশ্যে আহুতির ও মিলন-যজ্ঞের বলিরূপে বৃষ উৎসর্গ করে। মোশী সেগুলোর অর্ধেকটা রক্ত নিয়ে কয়েকটা পাত্রে রাখলেন, বাকি অর্ধেক রক্ত বেদির উপরে ছিটিয়ে দিলেন। পরে সন্ধির পুস্তকটি নিয়ে জনগণের সামনে পাঠ করে শোনালেন; তারা বলল, ‘প্রভু যা কিছু বলেছেন, আমরা তা সবই পালন করব, সবই মেনে চলব।’ তখন মোশী সেই রক্ত নিয়ে জনগণের উপরে এই বলে তা ছিটিয়ে দিলেন, ‘দেখ, এ সেই সন্ধির রক্ত, যা প্রভু তোমাদের সঙ্গে এই সকল বাণীর ভিত্তিতে সম্পাদন করেছেন।’

পরে মোশী ও আরোন, নাদাব ও আবিহু, এবং ইস্রায়েলের প্রবীণবর্গের মধ্য থেকে সত্তরজন আরোহণ করলেন। তঁারা ইস্রায়েলের পরমেশ্বরকে দেখলেন: তাঁর পদতলের স্থান নীলকান্তমণিতে তৈরী এমন শিলাস্তরের কাজের মত, যার শুচিশুভ্রতা আকাশেরই মত। তিনি কিন্তু ইস্রায়েল সন্তানদের এই প্রধানদের বিরুদ্ধে হাত বাড়ালেন না; না, তঁারা পরমেশ্বরকে দেখলেন, তথাপি খাওয়া-দাওয়া করতে পারলেন।

শ্লোক যোহন ৬ : ৪৮-৫০, ৫১

প্ আমিহ সেই জীবন-রুটি। তোমাদের পিতৃপুরুষেরা মরুপ্রান্তরে মান্না খেয়েছিলেন, তবুও তঁারা মারা গেছেন।

উ এটিই সেই রুটি যা স্বর্গ থেকে নেমে আসছে, যেন মানুষ তা খেতে পারে আর মরে না যায়।

প্ আমিহ সেই জীবনময় রুটি: যদি কেউ এই রুটি খায়, তবে সে অনন্তকাল জীবিত থাকবে।

উ এটিই সেই রুটি যা স্বর্গ থেকে নেমে আসছে, যেন মানুষ তা খেতে পারে আর মরে না যায়।

দ্বিতীয় পাঠ - আকুইনোর সাধু টমাসের রচনাবলি

স্কুদ্র পুস্তক ৫৭ : ১-৪

আহা, অমূল্য ও অপরূপ অন্নভোজ !

ঈশ্বরের একমাত্র পুত্র আমাদের তাঁর আপন ঈশ্বরত্বের সহভাগী করতে ইচ্ছা ক’রে আমাদের স্বরূপ ধারণ করলেন যাতে নিজেই মানুষ হয়ে মানুষকে ঈশ্বর করতে পারেন।

মানবীয় যা কিছু তিনি ধারণ করলেন, তা সবই আমাদের পরিত্রাণের জন্য উপযোগী করলেন; বাস্তবিকই আমাদের পুনর্মিলনের উদ্দেশ্যে তিনি নিজ দেহ ক্রুশবেদিতে বলিরূপে পিতা ঈশ্বরের কাছে উৎসর্গ করলেন; তিনি মুক্তিমূল্য ও প্রশংসালন স্বরূপে নিজ রক্তই পাত করলেন, যাতে হীনতম দাসত্ব থেকে মুক্ত হয়ে আমরা সকল পাপ থেকে ধৌত হই।

কিন্তু তেমন মহান উপকারের স্মৃতি যেন আমাদের মধ্যে থাকে, তিনি বিশ্বাসীদের কাছে নিজ দেহ খাদ্যরূপে ও নিজ রক্ত পানীয়রূপে রেখে গেলেন তারা যেন রুটি ও আঙুরসের আকারে তা গ্রহণ করে।

আহা, অমূল্য ও অপরূপ অন্নভোজ! আহা, পরিত্রাণদায়ী ও সমস্ত মাধুর্যে পরিপূর্ণ অন্নভোজ! এ অন্নভোজ ছাড়া অধিক মূল্যবান কী আছে? আগেকার বিধানের মত এ অন্নভোজে বৃষ ও ছাগের মাংস দেওয়া হয় না, কিন্তু প্রকৃত ঈশ্বর যিনি, সেই খ্রীষ্টই খাদ্যরূপে আমাদের সামনে উপনীত। এ সাক্রামেন্টের তুলনায় উৎকৃষ্টতম কী আছে?

সত্যি, এ সাক্রামেন্টের চেয়ে পরিত্রাণদায়ী কোন সাক্রামেন্ট নেই, কেননা এ সাক্রামেন্ট দ্বারাই পাপ শোধন করা হয়, সঙ্গুণ বৃদ্ধি পায়, ও অন্তর সকল আত্মিক অনুগ্রহদানের প্রাচুর্যে পরিতৃপ্তি লাভ করে।

এ সাক্রামেন্ট মণ্ডলীতে জীবিত ও মৃতদের কল্যাণার্থে উৎসর্গীকৃত হয়, যাতে সকলেরই উপকার হয়—যেহেতু সাক্রামেন্টটি সকলের পরিত্রাণের উদ্দেশ্যেই প্রতিষ্ঠিত হয়েছিল।

তাছাড়া এ সাক্রামেন্টের মাধুর্য কেউই বর্ণনা করতে পারে না: তার মধ্য দিয়ে মানুষ প্রকৃত উৎস থেকেই আত্মিক মাধুর্য আনন্দ করে; এবং খ্রীষ্ট নিজ যন্ত্রণাভোগে যে শ্রেষ্ঠতম ভালবাসা দেখিয়েছেন, এ সাক্রামেন্টেই তার স্মৃতি পালিত।

অন্তিম ভোজে শিষ্যদের সঙ্গে পাস্কা উদ্‌যাপন ক’রে খ্রীষ্ট যখন এ জগৎ থেকে পিতার কাছে চলে যেতে উদ্যত হচ্ছিলেন, তখনই এ সাক্রামেন্ট প্রতিষ্ঠা করলেন: এ সাক্রামেন্ট তাঁর যন্ত্রণাভোগের চিরন্তন স্মৃতি, প্রাচীন যত প্রতীকের পূর্ণতা, তাঁর নিজের অপরূপ কাজগুলোর মধ্যে শ্রেষ্ঠতম, মানুষের প্রতি তাঁর অসীম ভালবাসার সর্বোচ্চ প্রমাণ।

শ্লোক

প এ রুটিতে সেই দেহ স্বীকার কর যা ক্রুশে ঝুলেছে; এ পাত্রে সেই রক্ত স্বীকার কর যা তাঁর পাশ থেকে নির্গত হয়েছে। তাই খ্রীষ্টের দেহ নিয়ে খাও; খ্রীষ্টের রক্ত নিয়ে পান কর।

ঊ এখন আমরা খ্রীষ্টের অঙ্গ হয়ে উঠেছি।

প পাছে বিক্ষিপ্ত হও, তোমাদের মিলন-বন্ধন খাও; পাছে নিরাশ হও, তোমাদের মুক্তিমূল্য পান কর।

ঊ এখন আমরা খ্রীষ্টের অঙ্গ হয়ে উঠেছি।

যীশুহৃদয়

প্রথম পাঠ - রো চ : ২৮-৩৯

ঈশ্বরের ভালবাসা খ্রীষ্টে প্রকাশিত হয়েছে

আর আমরা তো জানি, যারা ঈশ্বরকে ভালবাসে, তাঁর সঙ্কল্প অনুসারে যারা আহুত, সবকিছুই তাদের মঙ্গলের উদ্দেশে কার্যকর হয়ে ওঠে, কেননা আগে থেকে যাদের জানতেন, তাদের তিনি তাঁর আপন পুত্রের প্রতিমূর্তির অনুরূপ হবার জন্য আগে থেকে নিরূপণও করেছিলেন, তিনি যেন বহু ভ্রাতার মধ্যে প্রথমজাত হতে পারেন। আর আগে থেকে যাদের তিনি নিরূপণ করেছিলেন, তাদের আহ্বানও করেছেন; এবং যাদের আহ্বান করেছেন, তাদের ধর্মময় বলেও সাব্যস্ত করেছেন; এবং যাদের ধর্মময় বলে সাব্যস্ত করেছেন, তাদের গৌরবান্বিতও করেছেন।

তবে এই সমস্ত কিছুর বিষয়ে আমরা কী বলব? ঈশ্বর যখন আমাদের সপক্ষে, তখন কে আমাদের বিপক্ষে? যিনি নিজের পুত্রকে রেহাই দেননি, কিন্তু আমাদের সকলের জন্য তাঁকে সঁপে দিলেন, তিনি কি তাঁর সঙ্গে সমস্ত কিছুও আমাদের প্রদান করবেন না? ঈশ্বর যাদের বেছে নিয়েছেন, তাদের বিপক্ষে কে অভিযোগ আনবে? ঈশ্বর যখন তাদের ধর্মময় করে তোলেন, তখন কেইবা অভিযোগ উত্থাপন করবে? খ্রীষ্টযীশু তো মরলেন, এমনকি পুনরুত্থানও করলেন, তিনিই তো ঈশ্বরের ডান পাশে রয়েছেন, আবার আমাদের পক্ষে অনুরোধ রাখছেন। তাই খ্রীষ্টের তেমন ভালবাসা থেকে কে আমাদের বিচ্ছিন্ন করতে পারবে? কোন ক্লেস বা সঙ্কট, কিংবা নির্যাতন, ক্ষুধা বা বসন্তাভাব, কিংবা কোন বিপদ, কোন তলোয়ার কি তা করতে পারবে? যেমনটি লেখা আছে:

তোমার খাতিরেই আমাদের সারাদিন মৃত্যুর হাতে তোলা হচ্ছে;
আমরা বধ্য মেঘেরই মত গণ্য!

কিন্তু যিনি আমাদের ভালবেসেছেন, তাঁরই দ্বারা আমরা ওইসব কিছুতে বিজয়ীর চেয়েও অধিক বিজয়ী হই, কেননা আমি নিশ্চিত ভাবেই জানি যে, মৃত্যু বা জীবন, স্বর্গদূত, আধিপত্য বা শক্তিবৃন্দ, বর্তমান বা ভাবীকালের কোন-কিছু, উর্ধ্বের বা অতলের কোন প্রভাব, কিংবা কোন সৃষ্টিবস্তু, কিছুই আমাদের প্রভু খ্রীষ্টযীশুতে নিহিত ঈশ্বরের ভালবাসা থেকে আমাদের বিচ্ছিন্ন করতে সক্ষম হবে না।

শ্লোক এফে ২ : ৫, ৮, ৭ দ্রঃ

প্ অপরাধের ফলে মৃত ছিলাম যে আমরা এই আমাদের ঈশ্বর খ্রীষ্টের সঙ্গে সঞ্জীবিত করে তুললেন :

ট্ মহা ভালবাসায়ই তিনি আমাদের ভালবাসলেন !

প্ তিনি তেমনটি করলেন যেন আগামী কালে যুগযুগ ধরেই তাঁর সেই অসীম অনুগ্রহের ঐশ্বর্য দেখাতে পারেন :

ট্ মহা ভালবাসায়ই তিনি আমাদের ভালবাসলেন !

দ্বিতীয় পাঠ - রোমীয়দের কাছে পত্রে সাধু যোহন খ্রীসোস্তমের উপদেশাবলি

উপদেশ ১৫ : ১-২

ঈশ্বর আমাদের এতই ভালবেসেছেন যে, আমাদের পরিত্রাণের জন্য পুত্রকেও রেহাই দেননি

আগে থেকে যাদের জানতেন, তাদের তিনি তাঁর আপন পুত্রের প্রতিমূর্তির অনুরূপ হবার জন্য আগে থেকে নিরূপণও করেছিলেন। তুমি কি গৌরবের শীর্ষস্থান দেখতে পাচ্ছ? সেই একমাত্র পুত্র স্বরূপে যা, তারা অনুগ্রহ দ্বারা তা হয়ে ওঠে। কিন্তু তাদের ‘পুত্রের অনুরূপ’ বলে অভিহিত করা তাঁর পক্ষে যথেষ্ট হয়নি, তিনি তাদের জন্য আরও বাসনা করলেন, আর তা এ কথায় প্রকাশিত : তিনি যেন বহু ভ্রাতার মধ্যে প্রথমজাত হতে পারেন : এ দ্বারা তিনি সব দিক দিয়েই প্রকাশ্য এক আত্মীয়তা দেখাতে চান। আমার দৃঢ় প্রত্যয়, এ সমস্ত কথা খ্রীষ্টের দেহধারণ লক্ষ করে, কেননা ঐশ্বর্যরূপ অনুসারে তিনিই একমাত্র পুত্র।

তবে তুমি কি দেখতে পাচ্ছ কেমন অপরূপ দান তিনি আমাদের দিয়েছেন? ফলে ভবিষ্যতের জন্য আর চিন্তিত হয়ো না; আমাদের প্রতি তাঁর তৎপরতা অন্যত্রও ব্যক্ত, বিশেষভাবে যখন তিনি আমাদের প্রকাশ করেন যে, এ সমস্ত বিষয় আগে থেকেই স্থির করা হয়েছিল। বস্তুতপক্ষে মানুষ এক বিষয়ে পরিস্থিতি অনুসারে মত পালটায়, কিন্তু ঈশ্বরের সঙ্কল্প যুগানুক্রমে অপরিবর্তনশীল হয়ে থাকে, ও আমাদের প্রতি তাঁর ব্যবহার সর্বদাই মমতাপূর্ণ; এজন্য তিনি আমাদের বলেন : যাদের তিনি আহ্বান করেছেন, তাদের ধর্মময় বলেও সাব্যস্ত করেছেন : নবজন্মের জলপ্রক্ষালনের মধ্য দিয়েই তিনি তাদের ধর্মময় বলে সাব্যস্ত করেছেন। এবং যাদের ধর্মময় বলে সাব্যস্ত করেছেন, তাদের গৌরবান্বিতও করেছেন : অনুগ্রহ ও দত্তকপুত্রত্ব দানের মধ্য দিয়েই তিনি তাদের গৌরবান্বিত করেছেন। তবে এই সমস্ত কিছুর বিষয়ে আমরা কী বলব? প্রেরিতদূত বলতে চান, যত বিপদ ও ফাঁদ আমাদের চারদিকে পাতা হয়, আমার কাছে সে কথা উল্লেখও করো না; কেননা এমন কেউও যদি থাকত যারা ভাবী মঙ্গলদানে বিশ্বাস রাখে না, তবু পাওয়া মঙ্গলদানগুলি তথা আমাদের প্রতি ঈশ্বরের ভালবাসা, ধর্মময়তা-দান, গৌরবদান ইত্যাদি দানগুলির কথা তারা কোন মতে সন্দেহ করতে পারত না।

আর এসব কিছু তিনি তোমাকে দান করেছেন এমন চিহ্নেরই মধ্য দিয়ে যা মনে হচ্ছিল দুঃখেরই চিহ্ন; হ্যাঁ, সেই ক্রুশ, কশাঘাত ও শেকল যা তুমি অপমানজনক মনে করছিলে, ঠিক তা-ই জগতের সুব্যবস্থা ফিরিয়ে দিয়েছে। সুতরাং, সমগ্র বিশ্বে মুক্তি ও পরিত্রাণ পুনঃপ্রতিষ্ঠিত করতে যেমন তিনি নিজ যন্ত্রণাভোগ, অর্থাৎ সেই সবকিছু যা কষ্টকর বলে প্রতীয়মান হচ্ছিল তাই ব্যবহার করলেন, তেমনি তোমার জন্যও তাই করছেন।

ঈশ্বর যখন আমাদের সপক্ষে, তখন কে আমাদের বিপক্ষে? যে ভক্তজন ঈশ্বরের বিধানের প্রতি মনোযোগ রাখে, তার বিপক্ষে মানুষ কি শয়তান কি অন্য সমস্ত আধিপত্যও কিছু করতে পারে না। তুমি তেমন ভক্তজনের কাছ থেকে টাকা বিয়োগ করলে, তাতে তার লাভ হয়; তার নিন্দা করলে, ঠিক তোমার নিন্দাজনক কথার ভিত্তিতেই সে ঈশ্বরের চোখে আরও উজ্জ্বল হয়ে ওঠে; তুমি তাকে ক্ষুধার্ত করলে, তার গৌরব ও পুরস্কার বৃদ্ধি পাবে; এমনকি তুমি তাকে মৃত্যুর হাতে সঁপে দিলে সে সাক্ষ্যমরণের জয়মালা বোনে! তাই যখন কোন কিছুই তাকে আঘাত করতে পারে না, যখন যারা বাহ্যিক দিক থেকে তার অপকার করে তারা তাদেরও চেয়ে কম উপযোগী নয় যারা তার উপকার করে, তখন তেমন জীবনের তুল্য কী থাকতে পারে? এজন্য লেখা আছে, ঈশ্বর যখন আমাদের সপক্ষে, তখন কে আমাদের বিপক্ষে?

তিনি যা কিছু বলে এলেন, তা যথেষ্ট মনে না করে আমাদের প্রতি ঈশ্বরের ভালবাসার সর্বোচ্চ প্রমাণ উপস্থাপন করেন, সেই যে প্রমাণ তিনি প্রায়ই উল্লেখ করে থাকেন, তথা পুত্রের মৃত্যু। তিনি বলেন, মানুষকে খ্রীষ্টের প্রতিমূর্তির অনুরূপ করার জন্য ঈশ্বর তাদের ধর্মময় বলে সাব্যস্ত করেছেন ও গৌরবান্বিত করেছেন; আর শুধু তাই নয়, তিনি তোমার জন্য আপন পুত্রকেও রেহাই দেননি! এজন্যই তিনি বলে চলেন, যিনি নিজের পুত্রকে রেহাই দেননি, কিন্তু আমাদের সকলের জন্য তাঁকে সঁপে দিলেন, তিনি কি তাঁর সঙ্গে সমস্ত কিছুও আমাদের প্রদান করবেন না? যিনি আমাদের জন্য তাঁর নিজের পুত্রকে রেহাই দেননি, তাঁকে বরং উৎসর্গ করলেন, তিনি কি করে আমাদের ত্যাগ করবেন? তিনি সকলেরই জন্য, নির্বোধ ও অকৃতজ্ঞদের জন্য, শত্রু ও নিন্দুকদের জন্যই তাঁকে উৎসর্গ করলেন। তাই তিনি কি তাঁর সঙ্গে সমস্ত কিছুও আমাদের প্রদান করবেন না? তিনি যখন আপন পুত্রকে আমাদের দান করলেন, এমনকি দান করলেন শুধু নয়, আমাদের জন্য মৃত্যুর হাতেই তাঁকে সঁপে দিলেন, তখন প্রভুকে পাবার পর আকাঙ্ক্ষা করার মত তোমার বাকি কীবা থাকতে পারে? তবে তুমি যখন প্রভুকে পেয়েছ, তখন কেন অন্য কিছু নিয়ে তোমার এত দুশ্চিন্তা?

শ্লোক যোহন ৬:৫৭; সিরি ১৫:৩ দ্রঃ

প জীবনময় পিতা আমাকে প্রেরণ করেছেন, আর আমি পিতারই জন্য জীবিত,

ঊ তাই যে আমাকে খায়, সে আমার জন্যই জীবিত থাকবে।

প প্রভু জীবন ও সুবুদ্ধির রুটিদানে তাকে পরিপুষ্ট করবেন:

ঊ তাই যে আমাকে খায়, সে আমার জন্যই জীবিত থাকবে।